

ANG LITURHIYA SA PAGESUNOG SA MGA LUKAY/PALMO  
Alang Sa Abo Nga Gamiton Sa Pagbadlis Sa Miyerkoles

---

*Kini nga liturhiya gisugyot nga gamiton ingon nga pasiunang buluhaton sa adlaw nga Martes, bisperas sa “Ash Wednesday”, diha sa mga “central churches” diha sa kasaulogan sa Balaang Eyukaristiya. Kini nga adlaw gitawag nga “Shrove Tuesday” ingon nga maoy panahon sa pag-andam sa mga abo nga gamiton sa “Ash Wednesday” ug sa paghimo sa mga pagsugid sa sala [confession] ug pagpangayo sa kapasayloan [absolution] isip kabahin sa pagpangandam alang sa pagsaulog sa Panahon sa Kuwaresma nga magasugod diha sa buluhaton sa “Ash Wednesday.” Diha usab sa mga panimalay sa mga Kristohanon, kini usab mao ang adlaw diin ang tanang mga karne ug uban pa nga gikan o nahilambigit sa karne, hutdon sa pagluto aron kaonon tanan aron mahimong simbulo sa puasa [fasting] ug paglikay [abstinence] nga pagahimoon sa tibuok Panahon sa Kuwaresma.*

*Ang liturhiya magasugod diha sa gawas sa simbahanan. Ang ministro magtindog diha sa taliwala nga maga-atubang sa katawhan, sa iyang kilid ang mga “lay readers” nga dala ang mga kandila ug krus ug ang insensaryo. Ang mga tawo magtindog usab nga bitbit ang ilang mga lukay o palmo [nga gikan sa Palm Sunday niadtong imaging tuig]. Diha sa ilang atubangan andamon ang dako nga sunogan [hinlo nga kawa o kaha] nga ipahimutang daan samtang dili pa magsugod ang liturhiya. Pag-abot sa oras nga gitakda, himoon dayon ang pagsugod sa liturhiya sa mosunod nga paagi:*

ANG PASIUNANG AWIT

Padayon nga Nagtindog

ANG PAGPANGANDAM

*Pagkahuman sa awit, litokon sa ministro ang mosunod nga naga-atubang sa katawhan.*

Ministro : Sa Ngalan sa Dios: ang Amahan, ang Anak, ug ang Espirito Santo.  
Tubag : Amen.

Ministro : MGA HINIGUGMA NGA KATAWHAN SA DIOS: Ania kita karon nagakatigom aron pangayoon sa Ginoong Dios ang iyang kalooy aron diha sa atong pagpangandam alang sa pagsugod sa Panahon sa Kuwaresma kita unta mapuno sa kaaghop sa kinabuhi ug kadasig sa pagtoo aron magahinulsol sa sala ug magatinguha sa kapasayloan, magahimo sa mga mahigugmaong pagpang-alagad ngadto sa uban ug magakinabuhi diha sa pag-ampo ug sa pagpamalandong.

Ugma kita magakatigom pag-usab isip usa ka simbahan aron diha sa kasaulogan sa Balaang Misa dawaton nato ang pagbadlis sa abo diha sa atong mga agtang ingon nga timaan sa balaanon nga pagtamod sa pagsugod sa kasaulogan sa Panahon sa Kuwaresma sulod sa kap-atan ka mga adlaw. Karon ania kita nagkatigom aron himoon ang pagsunog niining mga lukay o palmo aron mahimong

abo nga gamiton sa simbahan ugma alang sa pagbadlis sa mga abo diha kanato.

*Dinhi nga bahin mohilom ang tanan sa makadiyot alang sa pag-ampo*

Ministro : Maga-ampo kita: O Dios nga maloloy-on, gibuhhat mo kami gikan sa abog sa yuta ug gitawag sa pagsunod kanimo sumala sa gisangyaw sa among Ginoong Jesukristo uban sa tibuok nimong Simbahan. Tan-awa kami nga puno sa kalooy sa among pagpangandam niining mga abo nga maoy timaan sa pagsugod sa among panaw diha sa Panahon sa Kuwaresma.

Itugot nga kami nga magahimo niining maong balaan nga panaw unta modangat diha sa tinubdan sa among pagkahimugso pag-usab ngadto sa lab-as nga pagtinguha sa imong katarong. Unta ang among mga paghalad magahatod kanamo sa pag-alagad sa imong katawhan ug magadala kanamo sa imong kalinaw. Unta ang among mga pag-ampo magabalaan sa among mga buhat, ug ang among mga pagsimba magadapit kanamo sa paglingkod diha sa langitnong piging sa hingpit nga kalipay uban sa imong Anak nga si Jesukristo nga among Ginoo, pinaagi sa gahom sa Espirito Santo.

Tubag : Amen.

#### ANG PAGBASA

*Magpabilin nga magtindog*

Dinhi pagabasahon ang pagtulon-an diha sa atubangan sa mga tawo nga magagikan sa libro ni Propeta Isaias 58:5-10

#### ANG HOMILIYA

Pagkahuman sa pagbasa, himoon sa ministro ang homiliya nga magapamalandong sa kahulogan sa pagpangandam.

#### ANG HAOM NGA AWIT

*Magpabilin nga magtindog*

#### ANG PAGSUNOG SA MGA LUKAY O PALMO

*Magpabilin nga magtindog*

*Dinhi nga bahin sugdan ang pagsunog sa mga lukay o palmo. Dapiton sa ministro ang mga tawo pinaagi sa pag-ingon:*

Ministro : Karon himoon nato ang pagsunog sa mga lukay o palmo. Gidapit ang matag usa nga hilom nga moduol aron ibutang ug sunogon ang iyang lukay o palma uban sa iyang kaugalingong pag-ampo.

*Ang matag-usa moduol ug iyang sunogon ang iyang lukay o palmo pinaagi sa Paschal Candle nga hawiran sa "lay reader" ug dayon ibutang tipon sa ubang mga lukay o palmo diha sa giandam nga sunogan. Samtang gihimo ang pagsunog awiton sa tubag-tubag nga paagi ang Salmo 51 hangtod nga mahuman o masunog gayod ang tanan.*

## ANG SALMO RESPONSARYO

*Magpabilin nga magtindog*

*Ang Salmo 51 awiton sa gitahasan nga "Psalmist" [1-2, 3-5, 6-7, 8-9, 10-11, 12-13, 14-15, 16-17, 18-19] ug ang Tubag: "Ang Dios nagahigugma kanato nga walay paglubad" awiton sa mga tawo.*

## ANG PAGBENDISYON SA MGA GISUNOG

*Magpabilin nga magtindog*

*Pagkahuman sa pagsunog sa tanang mga lukay o palmo, himoon sa ministro ang pagbendisyon sa tanang gisunog ug ang mga abo gikan niini.*

Ministro : Makagagahom nga Dios, balaana kining mga abo [+] aron mahimong gamit sa pagpadayag nga kaming imong katawhan gikan sa abo ug sa abo usab mopauli. Pasayloa kami sa among mga sala ug tipigi kami nga matitud-anon diha pagtamod sa balaang Panahon sa Kuwaresma.

Tubag : Amen.

*Dinhi benditahan ug insensohan sa ministro ang mga abo, ug dayon ipadayon ang liturhiya*

## ANG PAG-AMPO

*Magpabilin nga magtindog*

*Mahimong awiton ang usa ka haom nga imno. Pagkahuman sa pag-awit, himoon dayon ang mosunod nga pag-ampo:*

Ministro : Ang Dios maoy nagabuhat kanato, ug kita nasayod nga kita gikan sa abog. Karon maga-ampo kita aron pangayoon gikan kaniya ang kapasayloan sa atong mga sala ug ayohon niya ang mga samad nga nahimo tungod sa atong mga sala.

Tagabasa : Ihatag kanamo ang grasya sa tinuod nga paghinulsol.

Tubag : Ginoo, pamatia ang among pag-ampo.

Tagabasa : Lig-ona kami pinaagi sa gahom sa imong Balaang Espirito.

Tubag : Ginoo, pamatia ang among pag-ampo.

Tagabasa : Ihatag kanamo ang kaisog sa pagbarog nga malig-on batok sa mga pagsulay.

Tubag : Ginoo, pamatia ang among pag-ampo.

Tagabasa : Tabangi kami nga mahimong matngon sa dungog ug tawhanong katungod sa uban.

Tubag : Ginoo, pamatia ang among pag-ampo.

Tagabasa : Bag-oha ang imong gugma diha sa among mga kasing-kasing, ug himo-a kami nga magasaksi kanimo diha sa matag-adlaw namo nga kinabuhi.

Tubag : Ginoo, pamatia ang among pag-ampo.

Ministro : O Ginoong Dios: Imong tinguha nga kami dili mamatay diha sa sala apan magahinulsol hinoon niini. Sa kalooy, tan-awa ang

among pagkamakasala tungod sa among pagkatawhanon. Kami nasayod sa among kaugalingon nga kami gikan sa abog, ug mobalik usab sa abog diha sa kamatayon. Apan malooy ka kanamo, pasayloa kami sa among mga sala, ug ihatag kanamo ang ganti nga imong gisaad niadtong nagahisulsol. Pinaagi ni Jesukristo nga among Ginoo.

Tubag : Amen.

#### ANG PAGAWIT

*Magpabilin nga magtindog*

*Dinhi awiton ang usa ka haom nga imno ug hinay-hinay nga mosulod ang tanan sa simbahanan aron sugdan ang kasaulogan sa Balaang Misa sugod sa Pag-ampo sa Pagkaputli. Una nga mosulod ang mga nagdala sa insensaryo ug insenso, dayon ang mga nagdala sa krus ug kandila, [dayon ang diyakono kon aduna man nga nagdala sa bibliya], dayon ang mga koro, ang mga kaabag ug dayon ang pari. Pag-abot sa sulod sa simbahanan, sugdan dayon ang kasaulogan sa Balaang Misa sumala sa iyang na-andan nga paagi.*

---oOo---

#### PAHIMANGNO:

Ang mga abo hipuson pagkahuman sa pagsunog. Mas maayo nga tahasan ang usa ka *lay reader* sa paghipos niini pinaagi sa pagsulod ug pagtago niini sa opisina o sakristiya. Pagkahuman sa kasaulogan sa Balaang Misa, pinaagi sa tabang sa *lay reader* ag-agon ang mga abo gamit ang pino nga *screen* ug ibutang sa mga *receptable* diin sagulan siya sa “*Oil for the Catechumens*” aron mahimong andam sa pag-gamit niini sa sunod nga adlaw nga mao ang *Ash Wednesday* sumala sa liturhiya niini.